



## **Solidariedade co pobo e a revolución de Venezuela**

O Movemento Galego ao Socialismo reafirma a súa solidariedade co pobo de Venezuela e en defensa da profundización da Revolución Bolivariana. Rexeitamos a permanente inxerencia imperialista contra a soberanía nacional e o progreso social e denunciamos os novos intentos de desestabilización respaldados polas forzas reaccionarias dos Estados Unidos e da UE.

Os acontecementos recentes na Venezuela non son fenómenos illados nin respotas espontáneas a unha conjuntura particularmente adversa. Polo contrario, son más tentativas de derrocar a revolución, que dan continuidade aos distintos pasos que os sectores opositores -respaldados, organizados e financiados polos Estados Unidos- teñen tomado desde o triunfo do proxecto encabezado por Hugo Chávez. A Revolución Bolivariana afirmou a soberanía nacional, atinxiu numerosas conquistas populares, inspirou e impulsou diversos proxectos de integración, nomeadamente a ALBA, e revitalizou o papel da Cuba socialista en América Latina, de xeito que alterou a hexemonía estadounidense na rexión.

As estratexias da oposición variaron, desde un golpe de Estado ao estilo máis tradicional, derrotado en 2002, até un paro petroleiro, os violentos disturbios de rúa -as chamadas "guarimbas"- do ano pasado, os ataques a sedes comunistas ou os asasinatos de oficiais, deputados nacionais, dirixentes obreiros e campesiños. No entanto, os obxectivos son os mesmos: subvertir a vontade popular por medio do ilexitimo e violento debilitamento da Revolución até a súa eliminación, a anulación de todas as medidas populares, e o retorno do país á esfera política e económica dos Estados Unidos.

Máis perversa áinda é a guerra económica, que pretende actuar de forma subterránea e anónima contra a estabilidade do goberno, provocando unha crise socioeconómica ao servizo da dereita e os seus obxectivos políticos. Esta ofensiva económica toma a poboación como refén nunha dinámica cruel, na que os seus éxitos dependen do aumento dos padecementos do pobo, por medio do acaparamento e especulación con produtos de primeira necesidade -en contraste cos derivados-, a formación deliberada de enormes ringleiras diante dos supermercados, a escaseza desvinculada da produción, a venta con sobreprezo, o desvío de divisas, o contrabando internacional, a manipulación das axencias de calificación financeira, etc...

A máis recente ofensiva contra o pobo de Venezuela foi un novo intento de golpe de Estado, desarticulado polo goberno, no que estaban implicados oficiais da Aviación Militar xunto con civís. O presidente da República, Nicolás Maduro, afirmou que a oposición chegara se comprometer cos Estados Unidos a converter en ingobernábel o país, despois do cal se sucedería a presión diplomática internacional, unha campaña de criminalización mediática internacional e finalmente un ataque militar que imporía un goberno de transición.

Do MGS chamamos a atención sobre a desmesurada atención informativa que reciben os acontecementos políticos e sociais neste país latinoamericano desde a primeira victoria de Hugo Chávez. Esta sobreabundancia de información non implica que o noso pobo conte con elementos de análise ricos, diversos e suficientes para coñecer a situación política e económica na Venezuela, xa que nace dunha campaña sistemática de difamación e criminalización. A enxurrada de noticias baixa sempre manipulada para minar a imaxe da Revolución Bolivariana, con diversas fórmulas como a ausencia de contexto histórico e económico, a sobrerepresentación da oposición e a caricaturización do goberno, ou a adopción do disfraz da sincera preocupación humanitaria polas condicións de vida da poboación, cuxas dificultades económicas reais son magnificadas de forma espúrea e recorrente.

Esta centralidade mediática contrasta coa pouca dedicación á actualidade doutros gobernos da rexión caracterizados pola súa persistencia en implantar medidas antipopulares e reaccionarias, ou o silencio xeneralizado que merece a gravísima problemática social e económica das clases populares en todos os países que teñen gobernos estrateticamente alineados co imperialismo. Encoraxamos á clase traballadora galega a interpretar criticamente os medios de comunicación controlados polo capital, a acceder a meios de información alternativos, a fortalecer as organizacións que loitan polo socialismo e o internacionalismo, e a resistir tamén á guerra propagandística.

Departamento de Relacións Internacionais.

17 de febreiro de 2015.